

Bophelo bo bofsa mo marapong a omeletšego

Thero mo Hesechiele 37:1-14

Palo ya Beibele: Hesechiele 24

Temanathero: Hesechiele 37:1-14

Lengwalo la rena le bolela ka ditiragalo tšeo di kukago maikutlo. Batho ba Modimo ba bonagatšwa bjalo ka marapo a omilego a mantši, a robetšego mo madibeng a fišwago ke letšatši. Empa go bonagala nke maatla ao a fiwago a lebetše ka ona. Go bonagala nke seatla seo se sa bonagalego se tlile go buša bophelo go ona. Ka nnete ke Morena Modimo yo a tlilego go a tsoša. Ka nnete, seo se kuka maikutlo ge re se bala mo.

Temanathero: Bophelo bo bofsa mo marapong a omeletšego

Pele re lebelela temana ya rena, ga re lebeleleng ka bonako puku ka moka ya Hesechiele. Puku ye e na le diripa tše pedi. Kgaolo ya 24 yeo re e badilego ke karolo ya seripa sa bobedi ya karolo. Mo kgaulong ye, Hesechiele, yo ka nako ye a bego a le Babilona gammogo le mathopsa, ba humana molaetša wa gore Jerusalema e tlile go tšewa ke manaba, ya thubiwa gomme tempele ya fišwa. Go fihla ga bjale diporofeto tša Hesechiele di na le sebaka sa kgalemo. Ke mo diporofeto di tlilego go gogela batho thoko ya go sekwe ga bona le tshepo ya bona godimo ga toropo le tempele ya bona. Ke diporofeto tšeo di ba hlohleletšago go sokologa e sego fela ba agišane ba bona, empa le wena ka bowena!

Empa bjale tempele e wele e bile e thubilwe. Bjale tshepo ka moka ga e sa le gona. Gomme bjale, ge batho ka moka ba itlhuboga, Hesechiele o laelwa go tliša diporofeto tša lethabo. Gobane bjale ba ka se tshepele mo diphenyong tša bona, gobane bjale bofelong tsela e butšwe gore ba tshepe Modimo fela. Le gore ba tliše ditsela tša bona go yena fela. Hesechiele o ile a ganetšwa go itlhuboga ka lebaka la go fenywa ga batho ba gagwe. O laelwa gore a sepele gomme a botša batho ka mo Modimo a ikwago ka gona. Gobane mofelong kgonagalo ya gore lethabo la nnete le tumelo ya nnete di boe e gona.

Go na le bohlatse bja gore Hesechiele o be a swanetše go tliša diporofeto tša lethabo tše boima. Kudukudu ge o lebeletše seo se dirageletšego lelapa la gagwe. Re bala gore mosadi wa gagwe o ile a hlokofole mo dinakong tše boima. Empa Hesechiele o swanetše go tšwela pele go porofeta. O swanetše go thoma ka diporofeto tšeo di bolelago ka kotlo ya Modimo gore ditšhaba tšeo di tlišitšego batho ba gagwe, gomme ka morago o swanetše go porofeta bogolo le botše bja tsošološo ya Modimo go batho ba gagwe. Mo diporofetong tše Hesechiele o swanetše go humana kgothatšo ya gagwe lea bohloko bjo a bo kwelego bja gagwe.

Temana ya rena mo kgaolong ya 37 ke sešupo sa diporofeto tša bjalo, tše di bolelago ka tsošološo ya batho ba Modimo. Ka nnete dikuka maikutlo! Re bala mo temaneng ya mathomo gore Hesechiele o ile a bona pono. O išwa mo moeding. A le gona mo gare ga marapo a batho, marapo ao a omilego ao a phatlaleletšego. Mo dinakong tša kgale batho ba be ba tlwaetše go dula godimo ga dithaba. Dithaba tšeo di be di bolokegile. Go be go le bonolo go širiletša motse wo o lego godimo ga thaba. Gomme mo meeding yo mongwe o be a ka humana mafulo. Gomme ge ntwana e tla, gona mo meeding e be e le lefelo la tlhabano, madira a mangwe kgahlanong le a mangwe. Gomme seo Hesechiele a se bonago se šetše ka morago ga ntwana. Batho ba gagwe ba lobile ntwana gomme mašole a bona a bolailwe, e le a makgolo le diketekete. Gomme mašalela a bona a tlogetšwe mo a robetše, ga go motho eo a tlogo go a tloša goba mohlomongwe a epe molete o mogolo wa lebitla, gomme a tlogetšwe mo e le a diphoofole le dinonyana. Gomme mo lebakeng le mengwaga e mentši e fetile. Gomme ge Hesechiele a fihla mo gonabjale, o eme mo gare ga marapo a mantši. Marapo ao e sego a lehono, e bile a omeile, a šweufaditšwe ke letšatši.

Seo Hesekiele a se bonago mo, se a makatša. Le ga go le bjalo e be e se selo seo se sa tlwaelegago mo thokong tša bohlabela. Bjalo ka matsatšing a lehono mabitla a mantši ke setlwaedi lefase ka bophara, e ka ba nageng ya Rwanda, Bosnia, Iraq, goba mo gongwe. Gomme go feta mo setlwaedi se se be se sa tlwaelega e ile ya ba seema ka polelo ya dinako tša Beibele. Re bona mohlala mo temaneng ya 11 mo lengwalong la rena. Gona mo balsiraele ba šaletše gona, mo lebakeng la bo thopsa. Ba be ba le Babilona, re ka re lehono – mo lefelong la kgapeletšo. Tshepo ya bona ya go phologa e be e le e nyane. Gomme ge bjale ba humana kgoboketšo ya motse wa Jerusalema e tšerwe gomme e thubilwe ke ba Babilona tshepo ya bona e ile ya fela ganyane. Re ba kwa mo temaneng ya 11: 'Marapo a rena a omile, gomme tshepo ya rena e fedile, re fedišitšwe.' Gomme se e bile polela ya gore: marapo a rena a omile. Marapo a ka se kgone go bolela. Empa bao ke batho bao ba phelago bao ba boelago ka tsela ye. Go na le batho bao ba lahlilego tshepo ya bokamoso. Ka nnete ba bjalo ka marapo, marapo ao a phelago. Ke ka tsela yeo ba iponago ka gona.

Ka morago ga go ema mo lebaka, a lebeletše moedi o tletšego marapo ao a omilego, Modimo o botšiša Hesekiele potšišo. Hesekiele, ana o nagana gore marapo a a ka phela? Ana o nagana eng? Bjale Hesekiele a eme ka tšhogo, o rata go bolela ka polokego: Morena, ke Wena fela yo o tsebago. Ka nnete o nyaka go bolokega ruri. Ga a lebelele se sengwe go fetiša mo. Ke Modimo fela a tsebago seo se tlilego go direga. Gomme bjale, mo godimo ga tetelo yeo se sengwe se segolo se a diragala. Modimo o laela Hesekiele: Hesekiele: porofeta! Bolela le marapo ao! A botše: Marapo, kwang Lentšu la Modimo!

Ana o kile wa bona motho a rera mo mabilteng? Ka nnete, ge go na le lefu, batho ba tla kopana ba dikologa lebitla. Empa o sa kwe yo mongwe a bolela mantšu a mo go bao ba lego ka tlase ga mobu. Gomme se ke seo Modimo a se laelago Hesekiele gona bjale: 'Marapo, ekwang Lentšu la Modimo!' ke tlile go tšenya moya mo go lena. Gore le tle le phele. Marapo ke tlile go tšenya nama, godimo ga lena. Gomme ke le apeše ka letlalo. Ke tlile go le nea moya mo go lena, gomme le tlile go phela. Gomme le tlile go tseba gore ke nna Morena.

Gomme Hesekiele a homotse a maketše ka morago ga go lemoga seo a swanetšego go se dira, o thoma ka go se senye nako go boeletša mantšu a Morena. Temana ya 7 – gomme ke porofeta ka mo ke laetswego. Mohlomongwe se se be e le boikokobetšo gore o be a tseba gore mantšu a gagwe ka moka a ka se be le khuetšo. Gore a tlile go tliša phapang mo go marapo ao. Empa mantšu a ga a tloga mo molomong a gagwe, go ba se sengwe sa go makatša se diragetše. Ge ke thoma go bolela go be go na le lešata. Modumo o mogolo. Marapo ka moka a thoma go sepela. O ka gopola ka mo se se kwagetšego ka gona! Gomme marapo ga a šutha fela ganyane, empa a be a sepela. Ka moka ga ona a ya lefelong leo a laetswego. Lerapo le lengwe le lengwe le ile lefelo la lona, go thoma hlogong go fihla maotong. Gomme ka morago ga fao go a diragala Hesekiele a bona marapo a mašweu a thoma go se sa ba gona. Marapo a ba a mahwebidu. Mešifa le dinama tša kopana, gomme ka morago tša ba tše sehla – mmala wa letlalo la batho bao ba dulago mo thokong ya bohlabela. Gomme mo lebakeng tše dingwe ya ba o moso. Mo meriri e bego e bowa, gomme go sa lebeletšwe seo batho bao ba feletšego ba be ba robetše mo lebaleng. Pele Hesekiele a ka hlaloganya seo a se bonago Modimo o bolela le yena gape. Hesekiele porofeta go moya, moya wa bophelo: etlang go tšwa dikhutlong tše nne tša lefase, gomme le bodulele mebele ye e hwilego, gore e phele. Gomme Hesekiele a dira bjalo a boeletša mantšu a Modimo, gomme ka morago ga fao se ke seo se diragetšego. Mebele yeo e ile ya thoma go hema, gomme ya ema ka maoto – ya ba madira a mantši!

Go fihla ga bjale re be lebeletše pono yeo le humanego ke Hesekiele. Ka nnete se se kuka maikutlo, gore selo se bjalo ka se se ka kgonagala. Ditlamorago tšeo re di balago mo ditemaneng tša bofelo tša lengwalo la rena di re neela molaetša wa pono ye. Modimo gabotse o botša seo go ba Isiraele – marapo a rena a omeile, tshepo ya rena e fedile, go fedile ka rena. Bajuda bao ba lego bothopsa, ba ba – yo mongwe a ka e bitša bjalo a re – ka moka ruri ba a rogile. Tshepo ya bona ka moka e fedile, Jerusalema e fedišitšwe, gomme tempele e fedisitswe ka mollo. Ba

tšwetše pele go phela mo bo thopisa, gabotse ba tšwetše pele go hema empa go be go sa lekana go feta mo. Modimo o ba lebetše. Se e be e le seo ba ipotšago sona. Ana Modimo o sa le gona? Ba ipotšiša seo. Bjale ke ka mo Modimo a arabago ka gona. O a araba, o laela Hesekiele go botša batho ba: ke tlile go bula mabitla a lena. Ke tlile go tšhela moya wa ka go lena gore le tle le phele. Ke tlile go le bea mo nageng la lena. Gomme le tlile go tseba gore ke nna Morena yo a boletšego e bile yo a dirilego bjalo, go bolela Morena.

Se ke poeletšo yeo e tsebagalago mo go Hesekiele: le tlile go tseba gore ke nna Morena, yo a dirilego seo. Go kuka maikutlo nako le nako se Modimo a se dirago. Sa mathomo o romele dikotlo. Tše di tšhabegago, e bile ditšhoša go ka bala ka tšona, empa ke nnete. Gomme bjale, se kukago maikutlo ke tsošološo ya mediro ya Modimo. LE TLILE GO tseba GORE KE NNA MORENA. Ke Modimo fela yo a dirago dilo tše bjalo. Ke Modimo fela yo a ka dirago bjalo. Gwa makatša! Ke mogogolo, empa ke nnete!

Ditsela tša Modimo tša go dira ga di tsebagale. Ditsela tša gagwe di feta ditsela tša rena. O dira dilo tšeo re sa kgonego go di dira, dilo tšeo re ka se gopolego ka tšona. Se se bonagala go seo a se dirago batho ba gagwe ba Isiraele mo Testamenteng ya Kgale. Puku ya Hesekiele e hlatsela seo. Re bona ka mo kotlo ya Modimo go bonagalago bokamoso bja phološo. Bajuda ba ile ba fetola kgolaganyo ya bona le Modimo yo a phelago ka go lebelela go aga tempele, ba itshepile ka bo bona e le batho bao ba kgethilwego. Dikatlego tše ka moka, maikutlo a ka moka Modimo o di tšere ka moka go bona, go fihlela mo ba sa šalago le selo. Gomme ka seo Modimo o thoma mošomo wa gagwe wa mehlolo ya phološo. Ge fela ba thomile go ithuta go tshepa yena fela.

Isiraele o tlile go tsošwa gape. Ana Isiraele gabotse ke mang? Mo lebakeng la bjale, go na le dipeakanyo tšeo di beilwego, tšeo yo mongwe a swanetšego go dihlokomela pele o ka amogelwa bo bitšwa moJuda. Mohlomongwe seo se tsebagelago ke lebaka la ge mme wa gago e le moJuda. Seo ke setlwaedi sa tšebo. Dinyakišišo tše ntši di swanetše go tšeiwa go lebeletšwe lešika la gago, go bona ga e ba yo mongwe o na le madi a Bajuda, goba yo mongwe a ka bitšwa karolo ya Isiraele. Ga go le bjalo re bolela ka lešika la madi. Seo re ithutago sona mo Beibeleng mo go Testamente e Mpsha le a Kgale ke gore lesika la madi ga le bolele seo e sego therešo. E ka ba o karolo ya batho ba Modimo, empa tumelo yeo e bohlokwa. Mang le mang yo a dumelago a ka bitšwa morwa goba morwedi wa Aborahama. Gomme bjale ana o ba karolo ya batho ba Modimo? Ge go lebeletšwe mang le mang a ka ba leloko, mang le mang yo a dumelago mo go Modimo wa Aborahama. Ke yena Modimo yo e sa lego yena le lehono, a bušago lefase.

Aborahama le yena o ile a ithuta go dumela. Aborahama e be e le monna wa mohumi, ra dimillione. Gomme ka ge e be e le setlwaedi, gore bahumi go bothata gore ba dumele, gobane ba bile tshepo ya bona mahumong a bona. Ba ka ipoloka kgahlanong le tšeo e lego kotsi. Empa Modimo o ile a ruta mohumi Aborahama gore a be le tumelo go Yena fela. Aborahama o be a humile a kgona go dira dilo ka moka tšeo di mokgahlago, empa o be a se na le bana bao e lego ba gagwe. Gomme bofelong ge Modimo a moneela morwa, o ile a molaela gore a dire sehlabelo ka morwa a gagwe. Seo e be e le teko ya Modimo go bona ge Aborahama a dumela ka nnete. Gomme ge re bala mo pukung ya baHeberu ka ga Aborahama ge a be a lekwa ke Modimo ke tsela ye: Aborahama o boletše gore Modimo a ka kgona go tsoša bahu. Ke mo gobotse! Boipolelo bjo ke bjo Modimo a ratago go bo kwa molomong. Modimo o kgona go tsoša ngwana mo lehung. Ke boipolelo bjo Modimo a ratago go bo kwa mo molomong wa gago: Modimo o kgona go ntsosa le bana ba ka, le batswadi ba ka, mang le mang go tšwa mo lehung. Tumelo ye ke yeo Bajuda bao ba lego bothopisa ba bego ba swanetše go ithuta yona. Gomme porofeto yeo Modimo a e bolelago Hesekiele mo lengwalong la rena e ile ya ba thuša go tla go seo.

Ana le wena o dumela se? Ana o dumela gore Modimo o buša bophelo go bao ba hlokofetšego? Modimo ga a go tlogele. Modimo o dula a swere bana ba gagwe. O kgoboketša phuthego ya gagwe. Seo Hesekiele a se bonego e le pono se diragetše ka nnete ge Jesu a be a bapolwa. Ge a e hwa mabitla a mantši mo Jerusalema a ile a bulega gomme batho ba ile ba tšwa mo mabidleng

gomme ba boele ba phela (Mateo 27). Gomme ka morago ga matšatši a mararo lebitla a Jesu le lona le ile la bulwa. Gomme o tlogile go lona ka bogolo. Modimo o phethagatša seo a se tshepišitšego. O tlile go tseba gore ke nna Morena yo a dirilego seo.

Gomme bjale go na le bokamoso mo go batho ba Modimo, bokamoso go mang le mang yo e lego karolo ya batho ba Modimo, gomme gape: ana o ba karolo ya batho ba Modimo neng? Ge o bolela tumelo e tee ya Aborahama: ke dumela gore Modimo wa ka ke Modimo yo a phelago. Ke dumela o fentše lehu. Ke dumela gore o tsosološa bophelo bja ka. Bophelo bjo bo sa felego, bjo bo lego go Jesu. Ana o dumela tšeo? Ke morero wa Modimo seo a nyakago go se diragala, seo a se tshepišitšego, se tlile go diragala: ke tlile go tshela moya wa ka mo go wena, gomme o tlile go phela, gomme ke tlile go go bea mo lefaseng le lefsa (Ez 37:14).

Amene.